



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10



Meghalaya nung World Bank indang mapatongtem Dec 2022 tashi nung tembangtsü

Sunil Gavaskar nem SJFI medal agütsütsü



VOL. XIX NO. 69 (ADOK 69)

DIMAPUR

YANGTEPNÜ

(THURSDAY)

LUCHII

(DECEMBER) 16, 2021

₹ 5.00

Tanü Mon district ghonda 10 shibangtsü

Dimapur, December 15, 2021

(TYO): December 16, 2021 nü lokti sentong alitsü ayongzükba ajanga Mon district ajunga ghonda 10 shibangtsü ta Konyak Union (KU)-i Bodbarnü metetdaksüogo.

Iba lokti sentong ya Konyak civil society temi ayogzükter. December 4-5 anogotem Oting aser Mon jila nung nisung 14 tepsetba anema parnok lungkak

aitba sentong ayonga agütsü.

Brihostibarnü tenokdangba kübok district administration, medical emergencies, Fire & Emergency Services, Police personnel aser kaketshirtem madener, ta Konyak Union-i metetdaksü.

Parnokisa ketdangsurtem aser public dang tensa meraksatsü aser tetuyuba sülen anidaksü mepishia metetdaksüogo.

CANSSEA-i e-Pay Bill System mapa inyaksü mepishir

Dimapur, December 15, 2021

(TYO): Head of Departments (HoDs) aser Drawing & Disbursing Officers (DDOs) ajaki Nagaland sorkari e-Pay Bill System tenzüksü ashiba inyaksü mepishir ta Confederation of All Nagaland State Services Employees Association (CANSSEA)-i metetdaksüogo.

January 2022 tashi e-Pay Bill

System ajanga Salaries aser Wages agütsütsü atsülangogo. Anungji Finance Department-i tuyuba ama HoDs aser DDOs-iba mapang tsüingda PIMS/e-Pay Bill System maparen renemtsü mepishir, ta CANSSEA-i ashi.

Iba inyakyim ajanga state sorkar mapa inyakeritemi mapang shitak nung itasen aser allowances agizüktetsü, ta parnokisa ashi.

Nagaland-Assam arrtsü indang Sub-Committee senden ayonger

Dimapur, December 15, 2021

(TYO): December 20, 2021 nü Assembly Session agiba sülen Nagaland-Assam Border Issue atema Sub-Committee senden ka amentsü ayongzükogo.

Nagaland Legislative Assembly Secretariat, Kohima indang Committee Hall nung

senden amentsü ta Sub-Committee Chairman, Mhathung Yanthan-i ashi.

Assembly Session tembangba sülen minute 15 lir senden amentsü anungji Sub-Committee züngsem ajak adentsü mepishir, ta Mhathung Yanthan-isa metetdaksü.

Dimapur nung kinü tanur tasü mang angu

Dimapur, December 15, 2021

(TYO): December 15, 2021 nü Railway Track No.259/8-9, Dimapur nung kinü tanur sozükli ka indang tasü mang angu.

Tanü 11:00 ako meta kinü tanur tebur indang tasü mang angu aser teinyaksü ajak inyakba sülen District Hospital, Dimapur-i bener ogo, ta Dy.

Commissioner of Police (Crime) & PRO, Dimapur-i sangdong ka nung ashi.

Nisung kari danga iba kinü tanur mang agizüksü lira Officer-in-Charge GRPS, Dimapur. (Mobile No. 7085055021) den tongteptsü akok ta sangdong nungsa metetdaksü.

COVID-19 Nagaland: 3 taneptsü angu

Kohima, December 15, 2021

(TYO): Nagaland nung Bodbarnü nisung shinga dak-a COVID-19 meputet saka nisung asem taneptsü angu.

"Tanü Dimapur nung nisung asem taneptsü angu" ta Integrated Disease Surveillance Project atema State Nodal Officer, Dr Nyanthung Kikon-i ashi.

Tanü tashi nung nisung 32,161 dak putetba nungi 30,304 taneptsü nguogo.

Tang nisung 89 anepaludar saka parnok 74 dakbo shirangba yimya kecha mali, ta Dr. Kikon-isa ashi.

"Mongulbar tashi nung nisung

755,147 nem COVID-19 vaccine indang dose 13,22,439 agütsüogo" ta State Immunization Officer, Dr Ritu Thurr-i ashi.

Vaccine agirtemji frontline workers 60,983, healthcare workers 16,004, arishi küm 45 ser temapur 213,113 aser arishi küm 18 nungi 44 tsüingda alir 465,047 lir, ta pai ashi.

"Vaccine agirtem rongnung nisung 567,272-i dose anaprong agiogo. Parnokji frontline workers 48,577, healthcare workers 13,532, arishi küm 45 ser temapur 177,125 aser arishi küm 18 nungi 44 tsüingda alir 328,058 lir" ta Dr Thurr-isa ashi.

NSF-i AFSPA agientsü takhangba agütsüba sentong ayonger Dec 17 nü Old MLA Hostel junction Kohima nung agitsü



December 15, 2021 nü Hotel Japfu Kohima nung taoba aser tang teinyakdak NSF ketdangpurtem agiba noksa ka angur.

Kohima, December 15, 2021

(TYO): Mon district nung sepaitemi tai maketba nisung 14 tepsetba sülen Naga Students' Federation (NSF)-i AFSPA 1958 agientsü takhangba agütsütsü atema December 17 nü lokti sentong tulu ka ayongzükba agitsü.

"Iba sentong nung Naga nunger aika adenshitsu imlar aser tangsa Armed Forces (Special Powers) Act (ASFP) 1958 agienang ta takhangba agütsütsü" ta NSF president Kegwayhun Tep-i ashi.

NSF-i ayongba sentongji Old MLA Hostel junction nung anepdang 11:00 ako nung tenzüksü.

"Naga nunger tashiyim ozüing AFSPA kübok aliba agi laktetogo" ta Organizing committee convener aser taoba NSF president Vipopal Kintso-i ashi.

"Naga nunger kobika tajemzükba tia ka nung ayutsü. Oting lendong atalokba nung

ajemdaker Naga nungeri India sorkar dang AFSPA agientsü osang metetdaksütsü" ta paisa ashi.

"Taoba mapang security forces-i Naga nunger reshikangshiba indang zülüoka mayu saka Oting lendong ajanga India sorkari tashiyim aketba ozüing agientsü tenük lapoker alitsü onoki imlar" ta Vipopal Kintso-isa metetdaksü.

"Naga telok ajak den ceasefire agreements sign asüba aser olemtepba sülen onoki AFSPA agientsü ta imla. Talisa India sorkari NSCN(IM) den Framework Agreement aser Naga National Political Groups working committee den Agreed Position sign asüba sülen AFSPA agientsü imlaa liasü saka magien. Iba ajanga India sorkari Naga yimten tebilemstü latetsü asoshi temolung magütsüba sayur" ta paisa ashi.

Old MLA Hostel nung sentong agiba sülen Naga nungertem Raj Bhavan-i aotsü

aser Governor Prof Jagdish Mukhi ajanga India sorkar nem memorandum ka agütsütsü, ta paisa shisem.

AFSPA magienra kechi inyaksü ta osangbeneri asüingdangdang "Onoki kechi südir süaka asen lima nungi AFSPA agientsü atema maneni inyaka aotsü" ta NSF president Tep-i langzü.

NSF-i Naga civil society tem aser ano temeimer ajak iba sentong nung adentsü ayongzükogo.

Iba sentong nung Angami Public Organisation, North East Students Organisation aser Global Naga Forum nungi lennirtemi o jembitsü.

Maneni, Naga People's Movement for Human Rights aser Forum for Naga Reconciliation lennirtemia o jembitsü.

Oting lendong atalokba osang Eastern Naga Students' Federation lennir kati ashitsü.

Chief Minister temi AFSPA agientsü bangzüngteptsüla: Thangwang Wangham

Dimapur, December 15, 2021

(TYO): AFSPA benokba state tem nung Chief Minister ajaki pei pei State Assembly nung AFSPA agientsü atema telemtetba agiang ta Arunachal Pradesh nung National People's Party unit vice president Thangwang Wangham-i ayongzük.

"Iba tashiyim Act yagi tai maketba nisung tepsettsü aser reshikangshitsu ajungketer" ta Wangham-i ashi.

December 4 & 5, 2021 anogotem 21 Para SF aser Assam Rifles sepaitemi Mon District kübok Oting nung taimaketer nisung 14 tepsetba khukhua aitsür ta paisa ashi.

December 14, 2021 nü Wangham-i Oting yim semdang aser idangji tasür aser yirua aliba kibongtem den ajurutepa sensaksem. Paisa tasür kibongtem dang asükhu lemsatepba metetdaksü.

"December 4 nü Oting nunger

tai maketba aayangertem dak tashiyim mapa inyakba ya asaa kin ka nungi nisungtem tepsetba liasü. iba ya meimchir anema inyakba mapa tamajung ka lir. Tanü senso ajak indang tangatetba melenshiogo. Alima melenshiba ama tali bilemloka oa inyaksangshirtema tangatetba melenshiogo. Anungji tanü putu nung AFSPA nüngdak mali" ta Thangwang Wangham-i metetdaksü.

"Iba mapa inyakba Armed Forces personnel merenshitsu ni akhangba den külemi sorkar dang AFSPA agientsü akhanger. Onoki AFSPA kübok timtem aser reshikangshi masü saka yimjung, terenlok aginür aser taküm pela linür" ta paisa ashi.

Linük nung telungpur khuret azüoktsü atema IPC, CrPC aser UAP Act tem lateta lir, ta paisa shisem.

"Nagaland aser Arunachal Pradesh nung Konyak o Wancho

kintem ya tang tashi tangar memenepeba kintem lir. Nübertem taküm aser rongsen kümzüka ayutsü atema mapa inyakba sepaitemi Oting nung nisungtem tepsetba osang angashidang ni kanga aoksa" ta Wangham-isa ashi.

Parnok ya anogoshi aayangertem liasü aser nakmati atudak mapa inyak saka tia maka parnok injang agi kaset. Linük sasep nung mangatettep ya mitkar tashi amshia masü saka yimtenren olemtep ajanga tembangtsüla, ta paisa metetdaksü.

Paisa Mon district nung alirtem dang tensa meraksatsü aser ozüing mapa shitak inyakdaksütsü mepishia metetdaksü.

Thangwang Wangham ya Arunachal Pradesh nung Ex-MLA aser taoba Minister ka lir. Pa ya Naga nunger teimba ser aliba Longding District nungi lir.

MCTE pur jeli Khristmas sentong agi



Noksa abelen 'Most Promising Student' sempet angur aser achichilen o jembir Rachel Assumi angur.

Dimapur, Luchii/Dec. 15 (TYO): Mokochung College of Teacher Education, Yimyu, Mokochung pur December 15, 2021 nü MCTE campus nung jeli Khristmas sentong agia liasü.

Iba sentong ya "Peace on Earth" omen nung ajemdaker agia liasü.

Iba sentong mezüing shilem nung o jembir Rachel Jamir, Associate Pastor Women, Kumlong Baptist Church

ajanga telok dang taküm Khristmas nung mezüingbuba nung pei sasa yimjung yanglutsü aser temenen nungi alangzüksü bushitsü ayongzüka liasü.

Sentong nung Medemtsuba L Walling nem "Most Promising Student-Teacher of the Batch 2019-21" sempet agüja liasü.

Dr Bendangyapangla, Principal (In-Charge), MCTE ajanga la atema Khristmas ya kechi, ta asüba nungi jembir aser

Khristmas ya Tsüingrem temeim asadangtsü makok ta asenok dang nenshia sayuba ka lir aser nisung ajak anogoshi Khrista ama alitsüla, ta shia liasü.

Sentong tanabuba shilem nung kaketshir aser tesayurtemi shilem balala agia liasü. Iba mapang kari tsüingsang agi shilem agi, kari carol, kari shadow act, drama aser spoken word poetry amala agi shilem agia liasü.

NLA Session ter buba atema Car Pass agütsütsü

Dimapur, Luchii/Dec. 15 (TYO): 13 buba Nagaland Legislative Assembly indang Session ter buba December 20, 2021 nü amentsü aliba atema Car Passes aser Official Gallery Passes tem December 18, 2021 nü anepdang 10:30 ako nungi nikongdang 3:30 ako tsüingta tsüinglanglen agüja aliba ama agütsütsü, ta

sangdong ka ajanga ashi.

1. Ministers, Advisors aser AHODs tem ajaki Car Passes aser Gallery Passes ya Special Secretary (Home), Civil Secretariat, Nagaland, Kohima nungi meshitsüla.
2. MLAs, P.S/ PA to the Members temi Car Passes ya Reception Counter

Gate No-II, Nagaland Legislative Assembly Secretariat nungi meshitsüla.

3. HoDs, IPR aser osangbener ajungai parnok indang Car Passes ya Reception Counter, Gate No-I, Nagaland Legislative Assembly Secretariat nungi meshitsüla.

NPF jeli Khristmas benjong mungogo

Kohima, Luchii/Dec. 15 (TYO): Naga People's Front (NPF) pur "Glory to God in the Highest" omen nung ajemdaker NPF Central HQ Office, Kohima nung jeli Khristmas benjong munga liasü.

Iba sentong nung NPF Working president, Dr. Huskha Yeputhomi-i Khristmas tayongzüka o jembiba mapang party züingsem tetsür aser teburtem dang pei mapa nung temolung agüja inyaksü aser teyari aginüa alirtem yaritsü

ayongzüka liasü.

"Teyari nüngdaka alirtem asoshi asenoki langka tajung inyaksüla," ta pai ashi.

Pai iba sentong nung adener dang tamanger tajung kaka asütsü ayongzüka liasü.

2022 ya asenok ajak atema küm tajung ka asütsü, ta pai ashi.

Iba sentong nung N. Vihoshe Swu, tir, NPF Central Youth Wing aser Tsangsang nati Lai züingta liasü.

Sentong nung Oting yimdak lendong ajurur alirtem asoshi

tenla bendena liasü aser iba yimtsüing nung asürtem aser NPF Central general secretary, Asür Yanglong Konyak nem akum agüja minute ana mokrema liasü.

Iba sentong nung Yanhola & telok aser Ruokuolatuo nungertemi temeja ken aten, kong NPF press secretary Atou Liezietsu menden liasü.

Iba sentong tenzüka S. Akho Leyri-i sarasadem aser sentong tembanga P. Shing Khiam-i sarasadema liasü.

NCSU-i Traffic Police nem sempet agütsü



Kohima, Luchii/Dec. 15 (TYO): Nagaland Contractors & Suppliers (NCSU) pur December 15, 2021 nü jeli Khristmas benjong munga traffic police asem-i state yimtiba nung mapa meranga inyakba atema sempet agüja liasü.

North Traffic Control nungi traffic constables Lance Naik Temjensangla & Lance Naik Kevimenuo Sopfü aser South Traffic Control nungi Tsito Yhoshu nunger nem sempet sen 10,000 den kulizüing kaket agüja liasü.

Iba sempet ya NCSU tir Pele Khezhi ajanga agüja liasü.

Yohan 3:16 nungi Kohima Ao Baptist Church, pastor Temjen Sempo-i Khristmas osang abenba mapang, pei agitsü kisüing bilemba lokti kodanga mainer, ta ashi.

Asenok rongsen benpuba lokti

ka nung alir, kong nisung ajaki pei kisüing renloksü atema bilemer, ta pai ashi.

Anungji pai taküm Khristmas nung pei kisüing atema bilemba molungsentsü melenshitsu ajungshia liasü.

Khristmas tetetzü ya agütsüba lir, anungji asenoki nungnanga melie temolung ajak agi agütsütsüla, ta Pastor Sempo-i ashi.

Secretary PWD (Works & Housing) Kevin Zehol-ia iba sentong nung lokti dang PMGSY roads nungi project tem inyaksü ajungshi, koba agi lenmang maliba tesemtem nung nisungtem sendaktepba nung yaritsü, ta ashi.

Iba sentong nung NCSU general secretary John Kath aser Senior SP Kohima, Kevithutho Sophie nati Khristmas salem bena

liasü.

Traffic police nem iba ama sempet tajung agütsüba atema Senior SP Sophie-i NCSU dang pelaba lemsatepa liasü aser traffic police tem dang tarutsü anogotem nunga tali meranga inyaksü ajungshia liasü.

Traffic personnel mapa nung anibelem lir aser mapang ka-ka bo jangratemtsü maket, saka khuret angateta maneni tajungba nung inyaksüla, ta pai ashi.

Iba sentong nung NCSU secretary N Neilo Koza menden liasü aser NCSU secretary Hoshito Assumi ajanga tarur pela agizükba o jembir.

Sentong nung NCSU vice president Tseibou Khusoh ajanga melepzüing o jembir aser Khriesakuonuo Rutsa ajanga temeja ken ka tena liasü.

Naga Council Dimapur ajanga metetdaksür

Dimapur, Luchii/Dec. 15 (TYO): Naga Council Dimapur indang office ya 'winter break' atema December 15, 2021 nungi January 16, 2022 tashi shibangtsü aser January 17, 2022 nung tanaben lapoktsü, ta Naga Council Dimapur tir,

Etsungmomo Kikon-i sangdong ka ajanga ashi.

Sodi mapang tongtipang nüngdak kar adokra, Vice-President (Adm) den mobile number 9856359873 ajanga tongtepratem nung ajungtsü, ta sangdong ajanga ashi.

Tetsürtem atema maternity leave anogo 240 agütsütsü

Dimapur, Luchii/Dec. 15 (TYO): M. Phil. Ph. D. agiba mapang tetsür candidate nem khen atema Maternity Leave/ Child Care Leave anogo 240 agütsütsü, ta University Grants Commission (UGC) ajanga UGC (Minimum Standards and Procedure for Award of M. Phil. / Ph. D. Degrees) Regulations 2016 nung telemtetba ka agiogo.

Prof. Rajnish Jain, Secretary, UGC, Ministry of Education, Government of India ajanga December 14, 2021 nü sangdong

ka agütsüba nung Higher Education Institutions (HEIs) ajunga dang pei reju/ sendaka aliba college tem nung tenüing zülüoka aliba tetsür nem Maternity Leave agütsütsü asoshi tapet ozüing yanglutsü totuyuba agütsü.

Ajidang masü, attendance, examination form agütsüba nung mesüra danga facility atema tetsür kaketshir Under Graduate aser Post Graduate programme tem agir atema atsü-anem akatsü metetdakja liasü.

Kohima DC ajanga No Parking Zone atema metetdaksür

Dimapur, Luchii/Dec. 15 (TYO):

Deputy Commissioner Kohima, Gregory Thejawelie NCS ajanga sangdong ka nung, New NST nungi Rutsa Bakery tashi nung anepdang 8:00 ako nungi nikongdang 7:00 ako tashi 'NO PARKING ZONE' khen atema December 15,

2021 nü nungi agiena atar, ta metetdaksüogo.

Kasa sangdong ajangasa, New NST nungi Khuochiezhie (Local Ground) North Gate via Razhu Point tsüingta osettsüse agizükba aser inokba maparen ya nikongdang 7:00 ako nungi anepdang 8:00 tsüingta temer alitsüla, ta metetdaksü.



EAC Chumukedima office ajanga Telecom Service Provider ajunga dang Purana Bazaar nungi Chumukedima Town tsüingta National Highway nung telecom cable tem junga meyui alibatem anogo 30 tsüingta anepalutsü totuyuba agütsüba sülen Administration item tesemtem tsüingtong oa repringba shilem mezüingbuba tenzükgogo. Iba mapang nüburtem nem timtem agüja yua aliba cable tem agienja liasü. Verification phase tanabuba metenzükdang cable tem payimi ayutsü asoshi Telecom/Internet Service Providers ajunga dang tanaben lephsia metetdaksüogo.

Phek DPDB meeting cum pre-Christmas sentong agi

Dimapur, Luchii/Dec. 15 (TYO): Phek District Planning & Development Board (DPDB) meeting cum pre-Christmas sentong December 14, 2021 nü Kiwi Farm House, Laka Thuvopisu, Phek nung agia liasü.

Senden nung Minister, Planning & Co-ordination, Land Revenue and Parliamentary Affairs, aser Chairman, Phek DPDB, Neiba Kronu menden liasü.

Iba senden nung Kronu-i lokti dang terenlok aser lokti ajungtsü atema pei sasa tanaben shisadangtsü ajungshi aser tamajung bilemba nungi pila alitsü ayongzüka liasü.

Iba sentong nung MLA Kezhienyi Khalo aser Yitachu aser Principal, PGC, Dr. Vizovol Mekro nungertemia jembia liasü.

Maneni Tekheweu-u Lasuhand Cheweku Rhakho aser medemer temi temeja ken ka aten.

Welcome to My Handloom My Pride

STATE HANDLOOM EXPO

w.e.f. 7th TO 20th DECEMBER 2021

At URBAN HAAT, DIMAPUR, NAGALAND.

TIME : 10 AM to 5PM



ORGANISED BY:

NAGALAND HANDLOOM & HANDICRAFTS
DEVELOPMENT CORPORATION LTD.

DIMAPUR, NAGALAND.



150 YEARS OF
CELEBRATING
THE MAHATMA

SPONSORED BY:

Office of The
DEVELOPMENT COMMISSIONER (HANDLOOMS).

MINISTRY OF TEXTILES., GOVT. OF INDIA, NEW DELHI.

Meghalaya nung World Bank indang mapatongtem Dec 2022 tashi nung tembangtsü

Shillong, December 15, 2021

(Agencies): Meghalaya nung World bank ajanga senotsü teyari agütsüba mapatong 12 tashi December 2022 tashi nung tembangtsü, ta Meghalaya deputy chief minister Prestone Tynsong-i ashi.

World Bank ajanga teyari agüja inyakba mapatong 12 rongnung 10 ji gari lenmang aser ana apu lir.

Gari lenmang mapatong 10 ji Garo Hills district nung pungu aser Khasi Hills districts nung pungu lir.

Gari lenmang ajak agi kilometer 262.4 lir.

2020 küm World Bank-i Meghalaya nung mapatong inyaksü atema Rs 554.67 crores lemezükja liasü.

Mapatongtemji Meghalaya Integrated Transport Project (MITP) kübok agütsü.

"Onoki December 2022 tashi nung mapatongtem renemtsü alizüing lir" ta Prestone Tynsong-i ashi.

Japan-i tourism atema Meghalaya nem Rs 700cr agütsü

Japan International Cooperation Agency (JICA) nungi Rs 700 crore nguogo ta Mongulbarnü Meghalaya Chief Minister Conrad K Sangma-i ashi.

Iba ya Meghalaya nung tourism sector ajungkettsü aser renlokdaktsü atema lir.

State sorkari Rs 700 crore nungi Khasi aser Garo Hills region tem atema Rs 350 crore lemezüktsüogo.

West Garo Hills district kübok Sakal A.duma village nung Tourism Department indang eco-resort ka lapoktsüdang Conrad-i iba osang metetdaksü.

GOVERNMENT OF NAGALAND DIRECTORATE OF SCHOOL EDUCATION KOHIMA: NAGALAND

NO.: ED/AEI-8/2019

Kohima, the, 15th December 2021

NOTIFICATION

The Academic Calendar 2022 is hereby notified to all Government and Private schools functioning within the State of Nagaland for strict compliance.

| Month | Dates & Events |
|------------------------------|--|
| January | 17 - 29 Admissions for all classes to be completed |
| February | 02 First VEC/WEC/SMC/SMDC meeting |
| | 03 DEO/SDEO meeting with Heads of Govt. Schools |
| | 04 - 05 Parent -Teacher Association Meeting of respective schools |
| | 07 Commencement of Regular classes for Classes VI to X |
| March April | Conduct of HSLC, Class XI Promotion & HSSLC Examinations |
| | 05 - 16 April Submission of students' enrolment & teachers' particulars as on 01/04/2022 to DoSE/NBSE/DEO/SDEO for Classes Pre-KG to X |
| April May | Admissions for Class XII |
| | Commencement of Regular classes for Class XII |
| June | 05 Observance of World Environment Day |
| | 13 - 18 Submission of Class XII students' enrolment & teachers' particulars as on 01/06/2022 to DoSE/NBSE/DEO |
| | I Term Examination for classes I to VII |
| | Mid Term Examination for Classes VIII to X |
| | Admissions & Commencement of Regular classes for Class XI |
| July | 20 June - 09 July Summer Vacation for hilly region |
| August | 11 - 30 Summer Vacation for hot region |
| | 08-12 Submission of Class XI students' enrolment & teachers' particulars as on 01/08/2022 to DoSE/NBSE/DEO |
| | District Level Science Seminar |
| September | Second VEC/WEC/SMC/SMDC meeting |
| | 05 Teachers' Day |
| | II Term Examination for Classes I to VII |
| | Phase I Class VIII & IX Final Examination |
| | State Level Science Seminar |
| October | District Level Youth Parliament |
| | State Level Youth Parliament |
| November | Mid Term Examination for Class XII |
| | 11 Observance of National Education Day |
| | 14 Observance of Children's Day |
| December | Mid Term Examination for Class XI |
| | 01 Observance of World Aids Day |
| | III Term Examination for Classes I to VII |
| | Phase II Class VIII & IX Final Examination |
| | Final Examination for Class IX |
| | HSLC/HSSLC Remedial/Preparatory classes till 17 th Dec. |
| | Declaration of Academic Results for Classes I to IX |
| Winter Vacation from 19 Dec. | |

Issued by DIPR

(SHANAVAS C) IAS
Principal Director.

Myanmar nung 15,000 tema

Mizoram nung jenoka lir

Aizawl, December 15, 2021

(Agencies): Taküm February ita Myanmar nung mitkartemi sorkar atsünga agiba sülen Mizoram nung Myanmar nung 15,000 tema jenoka lir, ta Rajya Sabha MP, K Vanlalvena-i ashi.

Mizoram kübok tesem balala nung Myanmar sensotem jenoka lir, ta pai ashi.

Parnok teimba ka relief camps nung jenoka lir aser kar kinungertem kidang anenzüka lir. Sorkar aser civil society telokemi relief camps lapok, ta pai ashi.

Myanmar refugee tem nem anenzükdak, chiyungtsü, abensüoshi, chibo-aonbo aser tanga nungdakbatem agütsür. Sorkar, arogotem, political party tem aser kijatemi teyari balala agütsür, ta MP, K Vanlalvena-i metetdaksü.

Myanmar nung tanur aika sorkar school tem nung züngdaksür, ta paisa shisem.

India ya UN Refugee Convention of 1951 aser 1967 Protocol nung sign süa mali yonga Centre sorkari Myanmar sensotem yaritsü ayongzüker, ta paisa metetdaksü.

Mizoram sorkari Myanmar nung yaritsü atema lenmang bushiteptsü Centre-i nangzükogo ta chief minister Zoramthanga-ia taoba mapang ashi.

Mizoram kübok district trok-Champhai, Siaha, Lawngtlai, Serchhip, Hnahthial aser Saitual ajanga Myanmar kübok Chin state den kilometer 510 tashi international border lir.

Myanmar toktsür jena aruba Myanmar senso teimba ka Chin nung lir aser parnok ya alemli nungi Mizo nung den sendaktepa lir.

Myanmar sensotem nem relief & asylum agütsü atema Chief Minister Zoramthanga-i March ita Prime Minister Narendra Modi dangi shidi zülu.

Taküm March ita Lok Sabha MP C. Lalrosanga-ia teshimtet telok ka anir Union minister tem den ajurutepa Myanmar sensotem indang khuret lemsatepa liasü.

Hombarnü Myanmar senso lennirtemi Zoramthanga den ajurutep aser iba mapang state sorkari teyari agütsü nangzük.



TIR YIMYIM YIMOBILEM (EDITORIAL)

DIMAPUR YANGTEPNÜ, LUCII (DECEMBER) 16, 2021

Mebenshitetba tetuyuba

Alima tashidak wara tesashi, Covid-19, agi asenok ajak remoka mesüdaktsünüba agi tashidak aser mozü shitetter mongintemi teyuba teinyaktsütem shitak inyaka aotsü atema, yimteni senso shiai benshitsü atema teinyaktsü aika rongnung tongtibang asem agüja lir. Itemji, nisungtem alidak teti teni aser tebang nembangba sü 'mask' agitsü, nisung o nisung na tsüngda tetsüngda lia amentsü aser jajatsü aser teti sapon agi mesüra sanitizer agi teben shidoktsü. Atangji, item ajak dakji alaka Covid jem agitsübaji ajak atema kanga tongtibang kümogo. Tamasabo, nisunger yimya asünungji, covid jem agitsüba ya olulu aika adoka kanga tsübutepogo aser Covid jem agitsü sangdongba anema lokti senden tashi lia nokdangtsü merangogo. Ajisüaka, tashidak nokdangtsü melen tashidak anema mozü agiba sentong nokdangtsübaji tim masü ta angateta, tangbo asenok state nunga nisung teimbaka Covid jem agiogo. Iba jagi lokti sendena sademsadema agitetter aser tounüleni oa mapa ajak inyaktetter. Ajisüaka, timtem kaji, yimteni asenok senso shiai inyaktsü tetuyuba agütsüba nung asenoki mapa kuma mebenshitetba ka lir, ibaji nisung o nisung na tsüngda tepila lia amentsü, nokdaktsü aser senzusenpongtsüba mapa ya lir. Tang ya balaka, town-tem nung benjong atema shishilembaba mapang lir, anungji süoshi aser chiyongtsü ayokdakbo, nisungtem nungtepba agi, nungpoka aoa majung nungzudagi. Ano, item rongnungji aikati teni tebang sü agi menembang senzür. Itemji Covid-19 tashidak nokdangtsü asoshi yimteni zünga yutsüba ozüng raksaba mapatem lir, anungji shitakba agibo merenshitsüla. Talisa, mask magi tangar alidak senzürjibo senchi sen senpak 200 achitsü lateta yuja lir, anungji item ajak dangji senchiji chira yimten mapa asoshi sen aika sarutettsü. Ajisüaka, timtem kaji, nübortem yimti nung shishilembaa senzüdak shibai item ajaki mita repringtettsü? Aser ano tang ama benjong mapang shishilemba dakbo lapoktsü saka shibai shiba dang nenok ataang aser parnok tama mapang peria agia shishidakjang ta ashitsü? Item ajakji jembitsübo temela aser ozüng agütsütsüa tasakbo masü saka mapa kuma inyaktsü kanga tasak lir. Lokti adenshidaka tarur rongnung nisung ajak ajem agir asütsüla, ajisüaka tang ama tensa nung lokti senden alidak shibai Covid ajem agiba magiba mita repringtsü? Aji oda, azüklen nungi ozüngbo agütsü saka alilen nübortemi item ozüngtem sülen anidaktsüsa terenemba kecha maliba repringtetter. Atangji, teti sapon aser sanitizer agi teben metsüktsübajibo mita melitettsüa akok, ibajibo peisasa angatetter inyaktsü tim. Ajisüaka, lokti menungteptsü, covid ajem agirtem dang lokti senden nung adentsü aser tangar alidak teti nisung shiai mask agitsü ta asüba teinyaktsü aser tetuyubatemjibo nübortem oli aruli senzüdak mitkar kari mita repringtsüla. Aji mesüra yimteni ozüng agütsübaji menüdong akümer aser idangji nübortemsa timatemtsü aser akoksatsü. Atangji, nübortem dang pei taküm tashidak lendong nungi kümzüka alitsü asoshibo ozüng magütsüyonga angatetter inyaktsüsa tangatetba agüja ajungshi tajungba, kechiyong ozüng agi masü saka tangatetba agi inyakba nungji takok aser tesünep lir. Aji oda, alima nung tashidak tasen tapu balala poktetter, aser item tashidaktemji tasen asünungji aneptsütsü mozü maka, anungji akok tashi pei kumdang kumdanga tashidak memenatsü merangtsü tim. Covid-19 ama tashidak wara maliyonga asenok tangar alidaki aodangbo sü agi tenitebang nembanger aotsü aser teti sapon amshia teben shidoktsübajibo asenok awashi aser sobaliba akümtsüla, kechiyong alima nung ya teti tashidak ka mesüra kabo menateptsüsa senzüdagi ta bilemdi. Atangji, Covid-19 tashidak ama yabo balaka, yabo nisungi asaa nisung sūdaktsütsü asoshi tashidak bomb yangluba amai lir, iba tashidak ya tali karara menatepa aoer aser anepalu mesüjungni nisungtem süa adoker. Iba jagi o tanep agi mepishia masü saka ozüng tesashi agi nisungtem kimaia maludaktsüi kidang mongdaktsütsüsa akümer. Iba tangatetba nung, koba nübortem nem ozüngsa anidaktsü asoshi tetuyuba agütsüogo, ajibosa ozüng kuma amshitettsüsa yimten ket nung inyakyim alitsüla. Iba jagi asen lima ya tashidak wara nungi dang masü saka tanga ozüng raksaba mapatem nungja kümzüka alitsü.

OLEMSABANG

Shi AZÜ METEMBA ANEMA OZÜNG

~ Süpongnügang Longkümer, Darogopathar Dimapur

Temeim ya ajak dang nungi tulutiba, temeim yagi bei dang nungi pi tang, timtimer tang, aser tsükchir dang meimbaji kanga tang aria bilemba nungi adoka yariba temeim, Nisungi tang masü, saka Tsüngremi aginüba mapa lir. Saka temeim kabo azüapong nungi adoker, iba dangji asenok shin ou (o) ka o ka na tsüngta entsü nung teret mejektetter, mamatzü nung teret yongtetter ta jembiba ama shidak ataloker, mesüra meblemtang jembiba, mesüra inyakba nungi adoker. Anungji kanga junga bilemtanger jembiba mesüra lending lir. Asüngtangtepber jembira medong mejen ajak tepur junga inyaktetta temoatsü angur ta bilema atati.

Levi tapu 18 : 4-18,24 nung yamai shia lir. Kü ozüngtem tashi angang, aser ni nenok dang melaba inyakang. Ni Kibuba nenok Tsüngrem lir. 5 Ni nenok nem agütsüba yimsü ozüngtem nenoki penshiang ;aji penshiba agi nenok taküm alitsü. Ni Kibuba lir. Ibai Tsüngrem

* Shi azü metemba anema ozüng 6 Shingaia bei susem den metemtsü anasai maotsüla. Ni Kibuba lir. 7 Nai netsü shiba nebo kibutsü lir La mak sūdakja la den temetem. 8 Nai nebo kinungtsü den maksü tebenshi aji nebo maksü lir. 9 Nü adianu, nebo mesüra netsü jala, kidang mesüra tangalen asuba den temetem. 10 Nai bei semchir den temetem, kechaser aji na asoshi maksü lir. 11 Nai rabitsür jala den temetem, kechaser la nü adianu lir. 12 Nai nebo adianu den temetem kechaser la nebo kinunger lir. 13 Nai netsü adianu den temetem kechaser la netsü kinunger lir. 14 Nai nebo tambo mesüra tanubo kinungtsü den temetem kechaser la nümu lir 15 Nai nü jabasu kinungtsü den temetem kechaser la nü jabasu kinungtsü lir. nai la mak tesüdaktsü. 16 Nai neti mesüra nünu kinungtsü den temetem aji neti mesüra nünu maksü lir. 17 Nai tetsürla aser jala den temetem La jabasuer jala mesüra la jalar jala den temeten parnokji anasatiba kinunger lir. Aji japujari lir. 18 Nai nü mezüng kibutsü taküm alitang tiye masüra tenu den doktepba kibutsü asütsü maksü tebenshi. 24 Nü sasa ibala kecha nunga temenen temena, kechaser ni nenok jakdang aridokya aliba kintemi ibala ajak nung menena lir. Amnoni tenu Tamar ngua kanga azüaponga jashia shiranga adok kechiyong la tasüngtet aser tepur tajung air ka liasü saka Amnoni la tang inyaktsü kanga tasak liasü. Saka Amnon tembar ka tenüng agi Yonadab pa ya Dawid tenu Shemea er chir lir. Pa sangra agi Amnoni tenu Tamar tasüngtet raksatsü, saka raksatsürpo kanga sembaa adok. Iba osang Absalomi angashia kanga jashia ain adoka tenu Amnonji Absalomer kilir nem tepsetdaktsü. 2 Samuel 13 : 38 tashi nung tejangja angutsü. Adianu metemba nungi nok adokba atakatem angutsü. Amnon, Tamar, Aser Absolom parnok tepoji Dawid saka tetsü balala Ibai Tsüngrem ou nungi zülur.

Kin tetezü, Naga kin, Ao kin, moya, Tzüin, kin, yamala telemsa tang ajar, aser kidong tetezü tepu ka nungi jazükbarburtem dang ajar. Tetezü shi ren ka adianu lenpurji tsüraportemi-a nokdang makok, kibong akümtsüsa akümer. Saka liyonga aotang Bokpu ozü ama yimer yimsanger dasenlen sadoksadoka matongsem tet rongjenba aser chirnur lokdi kecha nunga mamshitang parnok rongjenba ajurur. Item tiyaji angudang kanga tesasatsüka tsürapori khen meküm tangtang asu ka raksatsür. Anungji iba tiya jagi maitsü kanga kumtangtsüla. Kanga tang sasatsüba angashir aser züngshir. Iba ama tiya ngua subaliba yanglushitsüla ta asubajibo arogai meyanglushitettsü Kechiyong ibaji aor kidong mekali saka adianu aianu otang lemputepti ta asüba olen angateter. Anungji Khrista dak amangerpo kidong renji yanglushiti ta sürapang Aor salang ka nung yim o nülaksü nung jembia yanglushi tajungba asütsü südi. Yimsüsürtemi tekülemba nung yimsüsür masü saka subaliba aser lipaliro nung yimsü asür ta angatetti. Rom 13 : 1-2 Nisung shiai yimsüsürtem kübok liang, kechiyong tashe ajak Tsüngrem nungi aser yimsüsüba bangdakji Tsüngremi latettsüba lir. 2 Anungji shibai yimsüsüba bangdak anema nokdakdir, pai Tsüngremi shimtetba anema nokdaker aser shiri yamaji inyaker parnok bei sasa obendangba angutsü. Iskariot Yihuda Yisu den jaja lia Yisu ayok aser pa sasa suseta asü; Akok tashi asenok ajaki tai memenatsü kumtangti.

KHRISTAR RONEM ADOKBA TAMANGER (Luk 2:10-11)

~ Dr. Imo Chujang Longchar

(Yashi adok nungi...)

Yisu Khrista kangki nung asü saka pa shia aru. Pa shia arur külen kechi atalok? Tetsür telok ka dang mezüng pa jungkai adoka sayu aser iba sülen angopur Peter dang jungkai adoka sayu. Christmas ya alima nem teimla/yimjung bener arutsüba mapang ka lir. Yisu Khristai alima nung pa yimli tenzükdang, pai tilar jaok/telungjem aka, sensaker jaok, shiranger jaok. Yisui odia dang ashi pa tesendokbapurtem asoshi aru aser ano pai takartema ochi mashi tim masüba leman nungi pela-a alitsü indang jembia, anungji pai Zacchaeus (tax-collector) dena jembia liasü.

Scottish professor James Steward-i züluba kaket nung pai yamai zülua lir, Yisuji tilar rongnunga kangasa tilatibaji pa liasü, aji oda süaka pai mepet ma nung Tsüngrem sentsüwangshidakja arutsüba indang jembia, kilir rongnunga tilatiba kilirji pa liasü shibai pa nütüng tetsüng dena apudaka tila kuma shidoktsü aji oda süaka kodang pa tekülemdak tesem-i aru, shishilempartemi pa aruba ngur jenshi. Pai meimchir jenti kümzü/aneptsü saka pai pabo mekümzüktet Tsüngremer sentong atalokdakja pa kangki nung asü. Yisu Khrista kodang Roman sepiatemi apu, Yisui kangasa mulungtoka aliba pa nütüng Peter-i kechi ashi? "O ni iba nisung ya shibar memetet" taa (3 times) Yisu menangzük (deny). Temiem adianu, tamanger tajung ka ama amanger saka tatem nung Yisu menangzükttetsüsa amangtetra koda tesasatsü.

Mapang ka nung nisung ka Yisu dangi aru aser yamai asüngdang, tesayur Caesar nem tax agütsüba ya tim asü masü ta asüngdang. Yisu-i langzü, senjang (coin) nungji shiba noksa ajenloka lir? Aser iba nisungba jagi langzü, Caesar noksa lir. Yisu-i yamai ashi, Caesar nem kechi tagütsütsü tim aji pa nem agüjang aser Tsüngrem nem kechi agütsütsü tim aji Tsüngrem nem agüjang ta ashi. Anosa iba nisungba jagi ashi, sürabang Tsüngrem nem kechi agütsütsüla? Yisu-i langzü, na shiba mezükba nung yanglu? Temeim adianu, na aser ni-a shiba mezükba nung yanglua lir? Shisadangdi arung. Iba Yisu asoba benjong mong nung Khristar ronem asen taküm nung, kibong nung, asen aliba lokti nung aser alimai sendoka aliba pur asoshi yimjung aser teimla bener arutsüba benjungmong asütsü Yisu dak rangloker pa mesükba nung mongdi ni ta iba Tsüngrem O ajanga ayongzük. Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Jungkai Adok nung shia aliba ama shiruru ka UN kima yua lir



Luchii/December 15, 2021: Tang Manhattan, New York City nung United Nations headquarters kima shiruru kürakyanglu ka amenoka lir, aser ibaji Yohan-i Jungkai Adok 13:2 nung shia aliba shiruru mesüker, ta aikati jembidar.

"UN Headquarters kima Visitor's Plaza anasa alima nung yimjung aser security atema tanüker ka yua lir. Tanüker noksaji shirem aser mongzü na mesüka lir aser ibaji Oaxaca, Mexico sorkari tenla agütsüba lir. Iba ya artists- Jacobo aser Maria Angeles nati yanglu," ta U.N-i twitter ajanga metetdaksüba den külemi noksaji-a saya.

"Laishiba kaket Jungkai Adok nung shiruru ana indang

shia lir, aser ibaji yimtenren tashi temaitsü lir aser merok keyi ama lir," ta Scott Freeze-i twitter ajanga metetdaksü.

"Tanga shiruruji tekara temaitsü mongzü tashikang amai lir. Iba kürakyanglu yanglutsü atema artist temji kechi agi ajungshiar, ta ni shisadanger," ta paisa ashi.

Jungkai Adok 13:2 nung yamai shia lir, "Ni anguba shiruruji merok-keyi amai lir, saka shirem tetsüng mesüka keta lir aser molosüngzü tebang mesüker. Dragon-i shiruru nemji pa tashi, pa menden aser bangdak tashi tulu agütsü."

Daniel 7:3-4 nunga yamai shia lir, "Idangji tzüym nungi shiruru balala pezü adok. Mezüngbubaji molosüngzü

mesüka liasü aser mongnü tashikang tena liasü. Aser ni repranga telidak nung tashikangtemji pettok aser aji alima nungi ajunget, aser nisung ama tetsüng ana agi nokdaksü, aser iba nemji nisung melungjang agütsü."

Ano twitter nung nisung katibo 1 Tesalonika 5:2-3 nung ajemdaker UN-i twitter ajanga yimjung aser security tetshiba den medemdanga tatembang anogotem indang lemsatep.

Iba Lai tekong nung, Kibubaji auer ama aonung arutsü. Nisungtemi 'yimjung aser teküzmükba' atema jembidang aoksa mashisa tsür ka tanur asotsü atema tashitsü atuba ama asütsü aser parnok mejenbutsü.

America nunger shilem 22-i dang Khristmas otsü junga meteta lir

December 15, 2021: America nunger shilem 22-i dang Laishiba nung shia aliba ama Khristmas otsü kanga junga meteta lir, ta Lifeway Research survey tasen ka ajanga bushitet.

Iba survey ya online ajanga September 3 nungi September 23, 2021 tashi agia liasü aser America nunger 1,005-i iba survey nung shilem agia telangzüba agüja liasü.

Kasa survey ajanga, America nunger shilem 91-i Khristmas benjung amonger aser shilem 9-i dang iba benjung mamonger ta bushitet.

Lifeway Research nung executive director, Scott McConnell-i, "America nungeri yimya balala nung Khristmas amonger saka kari dang iba benjung mamonger. Yisu Khrista asoba otsü meteta malirtema aikati yimya balala nung iba benjung amonger," ta metetdaksü.

Catholic Khristan shilem 99 aser Protestant Khristan shilem 97-i Yisu Khrista asoba benjung amonger, tanga yimsü amonger shilem 74 aser yimsü den sendaktepa malir shilem 82-i iba

benjung amonger, ta kasa survey ajanga bushitet.

Tebur dang nungibo tetsür shilem timbai iba benjung amonger; tetsür shilem 94 aser tebur shilem 89-i iba benjung amonger. Talisa U.S kübok Midwest nung alir nütsüng timbai (shilem 94) iba benjung amonger aser Northeast nung alir shilem 88-i iba benjung amonger.

America nunger timbakati Khristmas benjung amonger saka kari dang (shilem 22) Yisu Khrista asoba otsü jungjunga meteta lir, ta kasa survey ajanga bushitet.

Ano America nunger shilem 31-ia Yisu Khrista asoba otsü meteta lir saka otsü kanga tejangja memetet, shilem 25-i Yisu asoba otsü tera meteta lir aser shilem 17-ibo Yisu asoba otsü khenyongi memetet, ta Lifeway Research survey ajanga metetdaksü.

McConnell-isa, "Küm shia Khristmas indang imdangjem otsü tali bendenloker, ajisüaka Laishiba nung Yisu Khrista asoba indang shia alibabo memelenshir. America nunger

shilem 50 jungnüa ibo tangar den Khristmas otsü melemsateptetsü ta arendaka bilemer. December ita nung Arogotem nung Khristmas sentong rongnung tongtibangtibaji Laishiba nung shia aliba ama Khristmas otsü azüngba ya lir," ta metetdaksü.

Lifeway Research-i ashiba agi, ita shia Tenla kidangi khen mesüra asemben tashi aoer Khristantemji shilem 24 lir aser pezüben mesüra iba dang nungjagi tali aoertem shilem 45 lir, aser parnoki Khristmas otsü tajungba meteta lir. Ita nung khen dang Tenla kidangi aoertem mesüra maoertem (shilem 13)-i Khristmas otsü kanga junga memetet.

Khristmas otsü junga meteta aliba nung shisaliok agi-a tongti shilem agir. America nunger graduate degree ngua alir shilem 35 aser college degree shilem 26-i Khristmas otsü tera junga meteta lir aser high school diploma mesüra iba dang nungi tajemba azünger shilem 18-i Khristmas otsü junga memetet, ta kasa survey ajangasa metetdaksü.

ANO GO ABEN TSÜNGREM DEN

Mulungsoa Prokdi

"Nisung shia kechi koda pei temulung nung mulungtet aji oda agüjang; saka nunnganga masü, kangshia masü, kechiyong Tsüngremi pelashishia agütsüba meimer."

2 Korint 9:7

Pauli korint arogopur dang aluyimer metsü prokba tatishitsü amshia mulungsoa agütsütsü ajungshi. Aluyimer shibai jenti proker jenti aruba ama Tsüngrem nem kodang pelashishia agütsüdir Pai talubosa moatsütsü. Alu nung metsüjang mashi mashi meproker, saka tsüngküm mapang meteta alu nung metsü atener. Ano alu tulu süra metsü jenti prokteter saka alu tila nung metsü ajema proker. Alu tulu nung teimba rotentsü aser alu tila nung ajema bendentsü.

Alyimeri tsüngküm mapang meteter metsü prokba ama tamangertemi Tsüngrem nem koba mapang nung agütsütsü tim metettsü kanga tongtibang. Taküm nung arishi, shisatsü, rongsen aser temoatsütem ajak Tsüngrem nungi. Asenoki kodang Tsüngremi item temoatsütem agütsür ta meteta lidir, Tsüngrem külemtsü, asangtsü mamatsü aser mulungsoa tenlatsü. Pelashishia agütsübaji alu tulu nung tsüngküm mapang shitak nung metsü proker, jenti aruba metetm alitsü.

SARASADEM:

Ni akaba nungi pelashishia agütsütsü yariangma. Amen

Laishiba küm ka nung: Isaia 7-9, J Adok 5, T Ken 150

Myanmar linük nung sepaitemi Chin nunger Pastor ana tepset

Luchii/December 15, 2021: Hospital-i anir ao, aser pa Taoba hopta Myanmar kübok asüba osangji par kibong nem-Magway Region aser Chin a metetdakja liasü. State na nung Burma Army Sepaitemi asüngdangyaba temi Chin nunger lisopur pastor mapang nung pa reshikangshia ana tepsetogo, ta International tepset asütsüa akok, ta melung Christian Concern (ICC)-i melemi bilemer saka pa metetdaksü. tepsetba kuli tejangjajibo

Osang angazükba agi, taoba hopta Magway Region nung züngsemtemi Magway Region mapang nung Khristan pastor toktsür jena ogo aser pa ka tepset. Pastor jagi People's Defense Force (PDF) den tasü mangji tang tashi magütsür. Pastor Salai Ngwe Kyar ya Asho Chin kin nungi liasü. Pa Pyay jila nung aliba Asho Chin Baptist Seminary nung theology azüngba sülen Thet Kei Taung yimdak Christian Congregation Arogo nung pastor teinyakdak liasü.

December 6, 2021 nü Sidoktaya jila nungi arrshi küm Ano tanga osang ka nung, 26 pastor, Salai Ngwe Kyar par December 11 nü Chin State yimdak- Thet Kei Taung nungi kübok Kanpetlet jila nung Saw jilai aoba mapang nung sepaitemi Pastor, Om Kee apu aser tasüngnüsa pa tepseta sepaitemi pa apu. indok. December 12, 2021 nü

Anti-junta Magway People's Revolution Committee nungi ketdangser kati, pastor Salai pua police station-i anir ao, iba sülen maneni pa dang asüngdangyatsü atema No. 20 Defense Equipment Industry factory-i anir ao, ta metetdakja liasü.

Bodhbarnü pastor Salai Ngwe Kyar medical treatment agitsü atema Magway General pa pua liasü.


OLONG PAITEP # 6028

| | | | | | | | | | | |
|----|--|----|----|----|--|----|--|----|--|---|
| 1 | | | | | | 2 | | | | 3 |
| | | | | | | | | 4 | | |
| 5 | | 6 | | | | 7 | | | | |
| | | | | | | | | | | |
| 8 | | | | | | | | | | 9 |
| | | | | | | | | 10 | | |
| | | | | 11 | | 12 | | | | |
| | | 13 | | | | | | | | |
| 14 | | | | | | 15 | | | | |
| | | | | | | | | | | |
| | | | | | | | | | | |
| | | | 16 | | | | | | | |

| TIPILEN | LANGTSÜNGLEN |
|-----------------------------|------------------------------------|
| 1. O jembitsü tashi - 8 | 1. Tepok telung nung shilem ka - 7 |
| 5. Süngjang tapu ka - 5 | 2. Tamajung aküm - 5 |
| 7. Tekanük nung enokba - 5 | 3. Chi den külemi achiba - 3 |
| 8. Teka amtep - 5 | 4. Meimchir alimai aruba - 3 |
| 12. Tzük asendak - 5 | 6. Laishiba nung ayong ka - 4 |
| 14. Tsünpang tema aliba - 5 | 9. Tarutsü nükla - 7 |
| 15. Ken atenba yimya - 5 | 10. Tamendakdak/Nükjidong - 4 |
| 16. Asangur - 8 | 11. Tenük-telen mejungi aküm - 5 |
| | 13. Terok nungi adokba - 3 |
| | 14. Meimchir telemsa - 3 |

OLONG PAITEP # 6027 TELANGZÜBA

| TIPILEN : | LANGTSÜNGLEN : |
|--|--|
| 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar. | 1. Tai, 2. Asensor, 3. Tanü, 4. Kua, 5. Mitsüktsü, 6. Azübenshi, 8. Lah, 9. Jangkok, 12. Akok, 14. Nashi, 16. Sür. |



TANÜBO NAI LANGZÜANG

Q. "Buxa tiger reserve" koba state/UT nung lir ?
 [A] West Bengal [B] Andhra Pradesh
 [C] Bihar [D] Meghalaya
 (Taruba adok nung onoki langzüksü)
YASHI ADOK TELANGZÜBA: IndiGo

AO OSHI ANGAZÜKDAK:
TANÜ ANGAZÜKTSÜBA OJANG

Lisor
 (n) Pei alidak soa inteter (native)
 * Lisortemi pei lima meimtsüla.

Lisü
 (n) temesütsüba süngzü (rope)
 * Tanü asüng plastic aser narcol **lisü** kanga amshir.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA

December 16, 1966 nü
 Jimi Hendrix Experience
 UK nung mezüngbuba
 "Hey Joe," sayatsü.

SUDOKU # 6068 TELANGZUBA # 6067

| | | | | | | | | | | | | | | | | | |
|---|---|---|---|---|---|---|---|---|---|---|---|---|---|---|---|---|---|
| | 7 | 4 | 9 | | 2 | 5 | 3 | | 1 | 5 | 3 | 7 | 6 | 9 | 2 | 8 | 4 |
| | 6 | 2 | 8 | | | | | 4 | 8 | 4 | 7 | 2 | 5 | 3 | 9 | 6 | 1 |
| | 8 | | 4 | 1 | 7 | 9 | 6 | 2 | 2 | 9 | 6 | 8 | 4 | 1 | 7 | 5 | 3 |
| | | 7 | | 2 | | | | 6 | 5 | 3 | 2 | 1 | 7 | 6 | 8 | 4 | 9 |
| 4 | 5 | | | | 9 | 2 | | | 4 | 1 | 9 | 3 | 8 | 2 | 6 | 7 | 5 |
| | 2 | | | | 6 | | 5 | 1 | 6 | 7 | 8 | 5 | 9 | 4 | 3 | 1 | 2 |
| | 3 | | | 5 | | | 4 | 9 | 9 | 8 | 1 | 4 | 2 | 7 | 5 | 3 | 6 |
| | | 5 | 2 | | 3 | 8 | | 7 | 3 | 6 | 5 | 9 | 1 | 8 | 4 | 2 | 7 |
| | 9 | | | | 4 | | | 5 | 7 | 2 | 4 | 6 | 3 | 5 | 1 | 9 | 8 |

OJANG LUTEP # 5614

KÜTAM : [][][][][]
 KISTHRMAS : [][][][][][][][]
 MNGAPA : [][][][][]
 ASEITN : [][][][][]
 GUBMANA : [][][][][][][]
 GYAI : [][][][]
 ONKIBG : [][][][][]
 AAIK : [][][][]
 TMTIMTEAR : [][][][][][][][]
 ÜTASSÜ : [][][][][]

OJANG LUTEP TELANGZÜBA # 5613

ASEN DAK YIMYA ASER JAKLA TAJUNG LIRA AJAKI
 KETASENA MEIMTSÜ

TAN HOPTA ATEMA - KOMA SÜLA ?

Q. Nagaland nung India sepaitem ya melidaktsü nunga koma süla ?



December 15, 2021 nü Ghazipur arrtsü nung aluyimertemi linük wako amer pei kidangi meyipa aotsü lia tangokba noksa nung angur. Taoba Brihostibarnü Centre sorkari longkak aiter aluyimertem dang shidi ka ajanga parnoki akhangba ajak ataloktsütsü, ta nangzükba sülen nungi tenzuka aluyimertem pei kidangi meyipa odar.

Ajay Kumar Mishra minister menden nungi anentsütsüla: Rahul

New Delhi, December 15 (Agencies): Taküm October 3 nü Uttar Pradesh kübok Lakhimpur Kheri district nung rara adokba ken o bushisüngdangba telok SIT-i report ka agütsüba nung ajemdaker Bodhbarnü Congress lenir, Rahul Gandhi-i Centre sorkar dang tangsa Ajay Kumar Mishra Minister of State (MoS) for Home Affairs menden nungi anentsütsüla, ta takhangba agütsü.

Mongolbarnü Uttar Pradesh Police SIT-i, Lakhimpur Kheri nung tatalokba ya jelia asalentong yanglur inyakba lir, ta metetdakja liasü. Rahul Gandhi-i, "O jembitsü atema parnoki onok nem temelaba magütsür, ibayongji senden nung timtem adoker. Obendang ka agütsüogo aser minister ka densema lir, anungji o lemteptsü atema temelaba agütsütsüla, ajisiüka parnoki iba onük nung o melemtepnir," ta metetdaksü.

Minister of State, Mishra-i pa menden nungi anentsüla asü?, ta asüngdangba langzüdang Rahul-i, 'Atangji pai minister menden nungi anentsüla', ta ashi. Bodhbarnü Lok Sabha nung Rahul Gandhi densema Congress MP tem aikati Lakhimpur Kheri nung atalokba ken o nung ajemdaker Ajay Kumar Mishra Minister of State (MoS) for Home Affairs menden nungi anentsütsüla, ta takhangba agütsü liasü.

October 3 nü tatalokba nung aluyimer pezü densema nisung 8 asü aser iba tatalokba nung Ajay Kumar Mishra'er jabaso, Ashish Mishra-ia shilemagia lir. Rahul-i shidi ka ajanga Lok Sabha nung Secretary-General dang, "Senden nung tanga onüktem yutsür kanga rongdak onük ka nung o lemteptsü atema ni mepishir, aser ibaji: UP Police SIT report ajanga Lakhimpur nung aluyimertem tepsetbaji aibelena masü saka jelia asalentong yanglur tepsetba lir ta metetdaksüba lir," ta metetdaksü.

"SIT-isa iba ken o nung tai tonglokja alirtem anema benoka aliba arlla kar melentsü atema benokogo. Sorkari tangsa Minister of State for Home Affairs, Ajay Kumar Mishra anentsütsüla aser takoksa angur kibongtem nem ochi temeden agütsütsüla," ta paisa metetdaksü. Lok Sabha nung Congress Lenir, Adhir Ranjan Chowdhury-ia, "Lakhimpur Kheri nung tatalokba ken o dak sendakba nung Lok Sabha nung o lemteptsü atema Rahul Gandhi-i benokogo. Onoki sorkar dang pa minister menden nungi anenjang ta akhangtsü," ta metetdaksü.

IAF chopper lendong nungi kümzüksang Group Captain Varun-a süogo

Bengaluru, December 15 (Agencies): Tawa Tamil Nadu nung IAF indang chopper ka tsükokba lendong nungi kümzüksang, Group Captain Varun Singh-a mekümzükteti Bodhbarnü süogo. Pa Bengaluru nung aliba Command Hospital nung treatment tagidak liasü. Indian Air Force (IAF)-i twitter ajanga, "Tasütait Group Captain Varun Singh tanep asüba osang IAF-i tejashi nung sangdonger. December 8 nü helicopter tsükokba lendong nung pa mejungi yirua liasü. IAF-i mangyimer kibong den mangyim jashi lemsateper," ta metetdaksü.

treatment tagidak mapang nung süogo. IAF indang helicopter tsükokba lendong nungji Group Captain, Varun Singh dang kümzüka liasü. Tamalen Tejas fighter aircraft ka teyimdak mapang timtem adoka liasü saka Varun Singh-i iba tayimtsüji kanga junga azüokteta anendaksütetba atema taküm küm tetenzüklen pa nem Shaurya Chakra sempet agütsü liasü. Tamalen doctor temi, Varun Singh taküm kümzüksü atema taruba ghonda 48 ji kanga tongtibang asütsü ta metetdakja liasü. Varun Singh tebu, Colonel (reted.) KP Singh-a Army Air Defence nung tenzuka liasü aser pa adianu, Lieutenant Commander Tanuj Singh-a Indian Navy nung officer ka lir. Uttar Pradesh nung Congress lenir, Akhilesh Pratap Singh ya tebu adianu lir.

Tamil Nadu kübok Coonoor district anasa IAF Chopper tsükokba lendong nung Chief of Defence Staff General Bipin Rawat aser pa kinüngtsü na densema nisung 13 asü aser IAF Group Captain Varun Singh dang kümzüka liasü saka pa-a

December 15, 2021 nü Kolkata nung election nüboyim sentong ka nung Congress lenir aser Kolkata Municipal Corporation elections nung candidate, Ashish Chatterjee-i dengue tashidak anema merla-sü kati meyanger longkak aitba noksa nung angur.

December 15, 2021 nü Mumbai nung class 1 nungi cclass 7 nung azüngertem atema class tanaben tenzükba sülen nisung kati Santa Claus sübotsü sübor coronavirus awareness campaign ka nung shilemagia noksa nung angur.



December 15, 2021 nü Kolkata nung election nüboyim sentong ka nung Congress lenir aser Kolkata Municipal Corporation elections nung candidate, Ashish Chatterjee-i dengue tashidak anema merla-sü kati meyanger longkak aitba noksa nung angur.

Goa assembly election nung regional party tasen kari shilemagitsü

Panaji/New Delhi, December 15 (Agencies): Sangküm Goa Assembly elections nungbo regional party ana densema party aikati shilemagitsü; item party rongnung Trinamool Congress (TMC) den regional party tasen ana densema lir.

Kasa election nungsa BJP, opposition Congress, Arvind Kejriwal-i aniba AAP aser Shiv Sena party temia tokteptsü. Mamata Banerjee-i aniba TMC aser regional party tasen ana- Revolutionary Goans aser Goencho Avaaz-ia Goa assembly election nung party candidate tem toktepdaksütsü, ta osang angazüker. Kasa election nungsa Goa Forward Party (GFP) aser Maharashtra Gomantak Party (MGP) natia tokteptsü. 2012 küm nungi Goa nung BJP sorkar lir aser parnoki kümsük tasembenbuba atonga state yimsüsütsü nükjidong yur tokteptsü. BJP-ibo, iba election nung party aika toktepbpa ajanga parnok dang tajangzük angutsü, ta bilemer.

2017 küm Goa election nung Congress-i menden 17 angu aser BJP-i menden 13 dang angu saka BJP-i tanga regional party tem den lokteper sorkar aküm. Tangbo Congress MLA 4 dang lir. Taruba Goa election atema Chief Minister Pramod Sawant leniba nung BJP-i nüboyimtsü aser party election in-charge atema taoba mapang Maharashtra chief minister Devendra Fadnavis shimba sülen election atema maparen tenzükogo.

2017 küm Goa election nung Congress-i menden 17 angu aser BJP-i menden 13 dang angu saka BJP-i tanga regional party tem den lokteper sorkar aküm. Tangbo Congress MLA 4 dang lir. Taruba Goa election atema Chief Minister Pramod Sawant leniba nung BJP-i nüboyimtsü aser party election in-charge atema taoba mapang Maharashtra chief minister Devendra Fadnavis shimba sülen election atema maparen tenzükogo.

Tir, Kovind-i anogo asemnü Bangladesh semdang: Shringla

New Delhi, December 15 (Agencies): India Tir, Ram Nath Kovind-i anogo asemnü Bangladesh semdang aser Bangladesh yimtiba, Dhaka nung 50buba Victory Day sentong nung pa tetushi tejaoker asütsü, ta Foreign Secretary, Harsh Vardhan Shringla-i metetdaksü.

Bangladesh Tir, Abdul Hamid-i 50buba Victory Day sentong nung tetushi tejaoker asütsü atema Ram Nath Kovind jaoka liasü. Tir Kovind den Minister of State for Education, Dr. Subhas Sarkar aser Member of Parliament Rajdeep Roy na densema aoer. "Pai semdangba ya putiotsü nung temaitsü tuluka asütsü, kechiyong 2021 küm ya Bangladesh nung nüchiso anguba sülen Golden Jubilee abensaba küm lir, iba denji külemi linük ana (Bangladesh-India) tesendaktep yangluba sülen küm 50 ajungba küm lir. Kasa küm ya Pakistan sepaitem madak takok tulu anguba aser 1971 küm December 16 nü parnoki asen sepaitem- Indian armed forces aser Bangladesh sepaitem matsüngdang

'surrender' asüba küm lir," ta Shringla-isa metetdaksü. Coronavirus wara prokba sülenbo tang mezüng Tir, Kovind-i Bangladesh semdang, aser iba ya linük ana tesendaktep tsütsü tetezü tuluka lir, ta pai ashi. Foreign Secretary-isa 2013 küm nunga taoba mapang India Tir, asür Pranab Mukherjee-i Bangladesh semdanga liasü. Kovind-i iba linük semdangba mapang nung Bangladesh Ato kilonser, Sheikh Hasina aser foreign minister, AK Abdul Momen na den senden amentsü.

Kovind-isa Savar nung National Martyrs Memorial nung taküm tenla agütsü asür sepaitem nem akhüm agütsütsü. Pai Bangabandhu Memorial Museum-a semdanga par linük tebuti, Bangabandhu Sheikh Mujibur Rahman nem akhüm agütsütsü. December 16 nü Kovind tetushi tejaoker ama Victory Day parade nung adentsü. Parade nungji Indian Armed Forces nungia contingent kati shilemagitsü. December 17 nü Tir Kovind, Delhi-i meyipa arutsü.



December 15, 2021 nü Mumbai nung class 1 nungi cclass 7 nung azüngertem atema class tanaben tenzükba sülen nisung kati Santa Claus sübotsü sübor coronavirus awareness campaign ka nung shilemagia noksa nung angur.



Bristol, England nung aliba vaccination centre ka nung nisung noklang aika adenshia aliba noksa nung angur. UK sorkari teintet nübür ajunga dang omicron variant nungi kumzüka alitsü ajungshiba mapang England nung booster shots agitsü asoshi nübürtem adenshir.

French sepaitem küm tuko jungnüa lir Timbuktu yutsür

Timbuktu, Luchii/Dec. 15 (Agencies): Mali nung telungpur temi linük tesem aika agir aliba atsüngdoktsü mechi France nungi mitkartem arua yarir küm tuko jungnüa lir Timbuktu yimti nungi sepaitem yutsür ogo.

Taoba France Tir Francois Hollande-i February 2, 2013 nü Timbuktu nungi France mitkartemi Mali nung rara tenzüker, ta sandonga liasü. Mitkartem amenoka alidak Mongulbarnü France nisan atsüzük aser Mali indang nisan atsüket, kong France-i sepaitem anizüker ao tenzüker ano sepa 150 shi liasü.

Mali nung France indang Operation Barkhane military campaign nung tekolakba, General Etienne du Peyroux-i camp commander tasenba den teka amtepa salem aser süng agi yangluba sabi tuluka amoktsü aser iba mapang France mitkar indang tayimtsü ali anasa yima ao.

Yimya balaka nung France alitsü, ta Peyroux-i ashi. "Ibai Operation Barkhane indang nükjidadong alitsü: Mali nunger sasa par tia anitsü... saka teti yariteptsü."

Timbuktu nung Mali mitkar tashi ita lir, kong teti atema United Nations peacekeepers

2,200 jungnüa lir, ta France mitkari sangdong ka nung ashi. Mali north tsütsü 2012 küm separatist movement ka ama tenzüka sülen iba linük nung rara agi sünger lia aru, saka tanem tanemi telungpur telok balala pokteta linük central aser northern region tem amokbanga akum.

Rara ya kidanger linüktemia prokshia oa Burkina Faso aser Niger nunga kongshia lir, kong security tsütsü tashi maitba ajanga region nung nübürtem timtem nung lir.

France-i 2022 küm tetenzüklen tashinung Sahel region nungi par sepa 2,000 dak tema anizüker aotsü, ta küm tetenzüklen sangdonga liasü, aser iba sülen sorkar anemer teloktemi operation tabu balala agiba samatsütsü merang aser yangji aliba mitkartem nem training agüja arur.

Mali nung yimtenren tashi meiti aliba mapang iba telemtetba ya agi, kong Colonel Assimi Goita-i küm ka majungdang anaben tashi tashiyim amshia sorkar atsüngdoka liasü.

Mali nung mangatetep agi sünga aliba Wagner Group ajanga yimten yimsüsür tepsettsü nisungtem taa agütsür yoktsü akok, ta tawa osang kar

ajanga ashiba sülen France sorkar aser mitkar tashi amshia sorkar atsüngdoktsü tasa yanglurtem tsüngta tesendaktep tamajungba akum. Mali nunger rongnung France anemba tali nüngtugu akumba mapang ka nung iba tensa ya ajuru. Paris-i Mali nung azüdokshi maziükteter aser par tebilemba balaka lir, ta Mali nunger temi aitsür.

North tsütsü Kidal aser Tessalit nungbo France mitkartem amenoka aliba tesemtem shibangogo saka arütsü anasa Gao nung parnok lir.

Mali nung February ita tatem tashinung democratic elections tasen ka agitsü atema linük balalai züngzüka lir, saka ibaji mataloktsü amai yimya agi sayur.

Election atema January 1 tashinung terenlok tejangja ka magitetra, tenokdangba tali agütsüsemtsü, ta iba region nung aliba bloc, Economic Community of West African States (ECOWAS) ajanga Deobarnü tekum dangtsü ashi.

ECOWAS nungi Mali züngsem agienja lir aser transitional government züngsemtem senzüsempongtsü nokdanga lir aser parnok indang rongsen soita lir.

Taoba tir Jacob Zuma tanabentepuokdaki arutsü tuyu

Johannesburg, Luchii/Dec. 15 (Agencies): South Africa indang High Court ajanga taoba Tir Jacob Zuma dang tepuokdaki meyiba arutsü totuyuba agüja medical parole nung chiochtsü telemtetba agia aliba mamshir.

Bodhbarnü Judge Elias Matojane-i obendang agütsüba nung arishi küm 79 tain Zuma medical parole nung yutsütsü telemtetba agiba ya ozüng alema lir ta sangdong. Department of Correctional Services-i iba obendang ya asadanger aser mera agitsü, ta ashi.

Taoba tir indang ozüng meteter temi court telemtetba ya jembishinütsü asüngdang, ta Zuma indang charitable foundation ajanga Twitter nung ashi.

"Iba obendang ya tai lir aser temaba court kati obendang balaka agütsütsü lenmang sadema lir," ta foundation ajanga ashi.

Zuma, shiba September ita medical parole tenzüker, pa dang ochimashi ken o bushisüngdangba nung shilem agitsü tuyuba senzüka yutsüba mechi court mezüngmeshiba atema ita 15 tepuokdak ayutsü obendang agüja liasü. Kasa ita pai iba obendang melentsü merangba South Africa indang court tematibai agienja liasü.

Taoba tir Zuma ya küm tuko tashi South Africa nung yimsü süa aruba 2018 küm tembang aser pa indang 'prison sentence' tenzüksü atema July 7 nü pasasa arua liasü, aser iba yongji South Africa nung rongrong tulu adoka azüdokshia Zuma

busemer temi yimti-yimtung nung longkak aita liasü.

Longkak aitba ya tuluba kuma shishilempadak tesemtem nung auya tenzüker aser temesüng nisung ishikati yimsü asüba temer küm 27 süyiaka timtem balala ajuruba nübürtemi tokzüka sayua liasü. Iba mapang nisung 300 dak tema tepset aser shishilempadak tesem meyerijang aika raksatsü aser mi agi rongdoktsü.

Zuma-i kakat ka sayaba nung pai ochi inyaka sayutsü tebilemba lir, ta shia liasü. Iba kakat sayar anogo ishika lir High Court ajanga iba totuyuba ya agütsü.

Iba kakat ajungkettsü asoshi Hokulbarnü video ka sayaba nung Zuma-i "asenoki inyakba mapa nung ochi masüba" indang jembia lokti-i kechi atalok, aji metettsü tongtipang, ta shia liasü.

"Otsü yanglutsü nüngdak mali, kechiaser nai yamaji inyaksü tashi peria lir," ta pai menürema ashi.

1999 küm European firm pungo nungi nok-o-nü aliba dak sendakba nung ochimashi ken o tali atsülangtsü atema Zuma-i temang majungba ya amshir, ta pa anemer temi ashi.

Iba mapang Zuma ya deputy president liasü aser pai French defence firm, Thales nungi süpokrem sen aika meshia agi ta aitsür aser ashikülak mapa inyakba, ochimashi asoshi ken o 16 benoka lir.

Pai aibelen kecha meinyak ta ashir aser yimtenren tsütsü pa tsükdaktsütsü mechi obendangba tashi amshir, ta shia arur.

Haiti fuel tanker apokdak lendong nung nisung aika asü

Cap-Haitien, Luchii/Dec. 15 (Agencies): Haiti north tsütsü Cap-Haitien yimti nung totzü bena aliba truck ka apokba nung nisung 60 dak tema asü aser ano aika yiru, ta yangji aliba ketdangsürtemi ashir aser ketdangsürtemi lendong ajurur alirtem yaritsü atema teyari aser staff tali meshir.

Linük north tsütsü tzükum anasa aliba yimti nung iba lendong ya Mongulbar aonung ayatirm süyili ataloka liasü, kong mi agi temeket tesemtem rongdokba mapang lendong nungi jenburtem temai adoka ayimtena liasü.

Ghonda ishika lir, anasa aliba mozüki ka sünga yirur alirtem adenshi aser temang anepalutsü teyari aser medical staff tali meshia liasü.

"Onoki nisung 60 asüba jangjaogo aser ketdangsürtemi mitsü kuma rongdoker alidak nisung tasü mang bushir," ta Deputy Mayor Patrick Almonor-i ashi.

Almonor-i ashiba agi, motorcycle taxi ka paidoktsü merangdang iba truck anisang-

i gari ya maziükteti mükepok. Lenmang nung totzü inshi aser senzüsemponger tem totzü bendentsü nungtepa arua liasü, ta pai ashi.

"Ibai ayatirm süyir liasü aser ni ola tuluka angashi, anungji ni ozü tanurtem dang oa reprangtsü ashi. Totzü abenba gari ka pokogo ta pai ashi," ta arishi küm 61 tain Abraham Joanis-i ashi.

"Idangjisa ni ozü kinunger anir apu leni ao," ta pai ashi.

Iba lendong nung nisung 100 dak tema yiruba osang lir aser ki 20 shi arong. Asürtem ya timba akumtsü akok, kechiaser ki telung nung asürtem mezüngdangi lir, ta Almonor-i ashi. "Kechi atalokogo, ibai kanga tesasatsü lir. Nisung takum aika samaogo," ta deputy mayor-i ashi.

Linük yimtiba, Port-au-Prince aser temeket tesemtem nung telungpur telok balalai totzü abenba nung tenokdangba agütsüba ajanga Haiti nung totzü agi kanga anünga aliba mapang iba lendong ya ataloker alitsü.

(Maneni tapak 10 nung...)



Bowling Green, Kentucky nung gari aser nisung aliba ki raksar aliba anasa tanur indang kazütsü gari ka angur. Ayatirm nung tornado agi Bowling Green nung kongshia liasü aser iba yipru yagi tanurtem kazüdak tesem nung tesashiba amshia liasü.

Sür Küm Ka Ajungba Menungra-a Bilemteter

16/12/2020 - 16/12/2021

Oba nai onok doksür orr tanü küm ka rentetdaka, nü taküm nung teti ochi sayutsünge onoki kodanga mamateter onok ajake na kanga tang meimer.

**Chirnurtem, Semchirtem
Aser Kinungertem**



Office of the Süngratsü Senso Union Yisemyong TENÜNGSANG AGÜTSÜR

1. Mr Tekayanger Walling S/o Late. Repatsünge Walling, Promoted to Executive Engineer under NPWD.
2. Mr. Imochujang Longchar, S/o Late. Lipokmar Longchar, for conferring Ph.D in History of Christianity.
3. Mr. Imkumnixung Aier, S/o M.I. Temjen, N.S.T. Station Superintendent Enforcement Officer.
4. Mr. Markaba Longchar, S/o Imtitemsu Longchar, Motor Vehicles Inspector under Motor Vehicles Department.

2021 küm tsüngda parnoki temaba menden tajung ajangzükba atema Süngratsü Union Yisemyong ajanga tenüngsang agütsür aser pelaba iba sangbang ajanga lemsateper. Tsüngremi nenok taküm aser wadang maneni moajangma.

Sd/-
Akangkokba
President

Sd/-
Imtitoshi
Secretary

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

NO. DTE/ ESTT-2/NEET/01/2021-22/
Dt. Kohima, the December, 2021.

NOTIFICATION

This is to inform all the candidates who have applied and opted BHMS course under NEET, 2021 session, that there will be a Spot Counseling on 20th December, 2021 at 11:00 A.M. in the Conference Hall of Directorate of Technical Education, below New. Secretariat, Nagaland, Kohima, to fill 2 (two) BHMS Seats under National Institute of Homoeopathy, Kolkata.

The last date to report to the College for admission is 24th December, 2021.


(Er. M. NAKRO)

Additional Director & HOD

Issued by DIPR

ALIAYOKER

Dimapur nung Old Showba aser New Showba na tsüngda, 4 lane lenmang anasa (2nd & 3rd plot), ali bigha 11 tayoktsü lir. Talirner nem pei aginüba tasazük square feet nung sen Rs.150 agi ayoktsü. Tongtepratepdak – 90896 69298.



Nagaland nung amenoker aliba e-commerce 'Beauty Barn'-i December 15 nü company indang mobile app ka sayaogo. Iba app amenokba nukjidong tongtibangtibaji iba free app ya ajungkettsü aser customer tem nem introductory offer tem metetdaksütsü asoshi lir.

Sir Paul McCartney indang bass guitar 496k agi ayok

Luchii/December 15, 2021


(Agencies): Auction ka nung otsü tasen ka yanglua Sir Paul McCartney indang bass guitar USD 496,100 agi yokogo.

Arishi küm 79 tain kentener yagi iba Yamaha BB-1200 gitar ya mayok tsüngda studio nung aser Wings den tour asüba mapang ashia liasü. Iba gitar yagi otsü tasen ka yanglua auction nung sen timtiba aazükogo, koba taoba küm taoba Rolling Stones züngsem Bill Wyman indang 1969 Fender Mustang gitar USD 384,000 agi yoka sen timtiba aazüker liasü.

Iba auction ya U2 indang The Edge aser producer Bob Ezrin nungeri parnok indang Music Rising charity atema ayongzükba lir, kong ano otsü tasen kar yangluogo.

Eddie Vedder-i kenten sentong ka nung raksaba Lake Placid Blue Fender Telecaster ka USD 266, 200 agi yoka auction ka nung gitar teraksa ayokba ajanga sen timtiba aazükba gitar küma otsü tasen ka yangluogo.

U2, Bruce Springsteen, Lou



Reed, Johnny Marr, Green Day, Sir Elton John, Joan Jett, Kings Of Leon, Rush aser Radiohead nunger indang Instrument tem iba auction nung sayaa liasü.


Auction nung charity atema USD million 2 dak tema aazükogo, koba Gulf South nung musician tem nem teyari agütsüsü atema liasü, shirnok Covid wara poktetba ajanga takoksa tulu ajangshia arudar.

Edge-i ashiba agi, "Auction nung shirnoki pei jurila

instruments tem agütsüogo aser alima tesem balala nungi bidder shirnoki otsü tasen yanglutetsüsa teyari agüja auction nung shilem agiogo nenok ajak dang kanga pelar," ta ashi.

"Music Rising pusemer ajak dang kanga pelar, shirnoki onok tera bushia aotsü aser teyari nüngdaka aliba musician tem nem teyari agütsüsü atema onok nem maongka agütsüogo," ta paisa ashi.

Moko Koza-i 'Tribally Savage' ken sayaogo



Kohima, Luchii/December 15 (TYO): Naga nunger rap kentener Moko Koza-i, "Tribally

Savage" ta nüngja agütsür music video tasen ka sayaogo. Iba ken ya Bodhbarnü

nikongtsütsü social media sabang balala ajanga sayaogo.

Osang ajanga ashiba agi, iba ken ya pa indang kensep tasenba nungi mezüngbuba single lir, koba taruba küm tetenzüklen sayatsü renema lir.

Iba ken ya pai mejem aser pai aten . Iba ken yagi tetsü tebou mapang Naga nungertem koda leptepe tsüngtep tia nung liasü aser Naga nunger ya tekolak bushiba ki ka nungi jakzüka aru, iba indang jembir.

Ken ajangasa 1960s aser 1970s mapang Naga army aser Indian army na tsüngda mangatettepe tulu adoka raratepeba ajanga nüburtem koda timtem tia nung liyonga aru, iba indang jembir.

Kenteneri ashiba agi, iba ken ajangasa aser Naga nunger ya yimjung aser tesunep nung alitsü meimba kin ka, saka aser yimjung minprongra iba anema nokdaktetsü ta nenshia metetdaksür.

Iba music video ya YouTube nung <https://youtu.be/rZMvfTjq9pl> ajangasa aser tanga streaming sabang ajak nung angutsü.

Oppo Find N Foldable Smartphone sayaogo

Luchii/December 15, 2021

(Agencies): China nunger smartphone yangluba company Oppo-i, mezüngbuba foldable smartphone; Oppo Find N sayaogo. Iba smartphone ya Oppo indang Inno Day sentong nung sayaa liasü. Company-i ashiba agi, iba foldable device ya küm pezü tashi bushisüngdanga den prototype six generations develop asüba sülen yangluogo.

Oppo Find N nung 5.49-inch cover display, aser 7.1-inch main folding display keta lir.

Phone fold asüba sülen aspect ratio 18:9 asütsü aser lapoker inner screen indang aspect ratio ji 8.4:9 asütsü. Oppo Find N nung hinge nung components 136 lir aser precision 0.01mm asütsü. Inner display nung refresh rate 120Hz lir aser touch sampling rate ya 1,000Hz tashi asütsü aser peak brightness 1,000 nits asütsü.

Oppo Find N foldable nung Qualcomm Snapdragon 888 chipset den LPDDR5 RAM 12 GB aser internal storage

512GB inokja lir. Iba smartphone nung 4,500mAh battery ka keta aliba angutsü aser 33W fast charging den support asütsü. Smartphone yagi 15W wireless charging dena support asütsü.

Kasa mapang nung phone tesülen camera asem; Primary shooter 50-megapixel Sony IMX766, 16-megapixel ultra wide-angle lens aser 13-megapixel telephoto lens keta lir. Phone nung display anaprongla nung hole-punch selfie camera inokja lir.

1buba Naga Silat Competition tenzükogo



Alakteta jaoker Dr. Andrew Ahoto-i tetoktepbu tenzüksüba noksa nung angur.

Dimapur, Luchii/December 15 (TYO): Nagaland Pencak Silat Association-i ayongzükba 1buba Naga Silat Competition 2021, Bodhbarnü Immanuel Hall, Y. Zhimo Colony, Signal bosti nung tenzükogo. Iba asayamung atema Department of Tourism, Govt of Nagaland-i senotsü teyari agütsüogo.

Iba tetoktepbu ya Hornbill benjung nung shilem ka ama küm shia December 8 nü agir, ajisüaka December 6 nü Hornbill benjung athiba

ajanga atsülangtsüsa aküm.

Asayamung tenzüksüba sentong nung alakteta jaoker ama People's Party Nagaland, tir Dr. Andrew Ahoto-i, asenok jenjang balala nungi asütsü akok, saka asenoki kati ka nongita yaritepa, meimchir atema külemi longjemer inyakra, asenoki alima tajungba ka küma yanglushitetsü, ta ashi.

Education ji kanga tongtibang, ajisüaka aji teperi masü; tanga co-curricular activities tema kanga

tongtibang. Pai, tetokteperem dang tashi ita alitsü aser nukjidong tongtettsü atema temulungtetba tulu ayutsü ajungshi.

Lanurtem ajungshia pai, tanurtem shirnok tarutsü nukla lir, parnoki lenmang shitakba aser tai jangjatsü nungdaker, ta ashi. Lanurtem ket nung ajak lir aser organization-i parnok nukjidong ataloktsü atema lenmang shidak nung anitsü imlaba pai lemsatop.

Iba tetoktepbu nung nisung 100 shi-i shilem agidar.

4buba International Strongman & Cross Fit Competition ayonger

Kohima, Luchii/December 15 (TYO): Kohima Smart City Development Ltd den longjemer Nagaland Strongman & Fitness Association (NSFA)-i, 4buba International Strongman and Cross Fit Competition ayongzüksü. Iba tetoktepbu ya December 18 nü Old NST, Kohima nung "Eat Well, Eat Safe" (tetsür & tebur) omen nung ajemdaker anepdang 8:00 ako nung tenzüksü.

NSFA tir Keduovilie Zumu-i sangdong ka ajanga ashiba agi,

iba tetoktepbu nung ajak senteper senpet sen 1,50,000 agütsütsü, koba KC Angami-i sponsor süogo. Iba tetoktepbu atema Govt. of Nagaland, Directorate of Tourism, Directorate of Economics & Statistics, IDBI Kohima aser Kohima Smart City-ia teyari agütsütsü.

Tetoktepbu nung shilem agitsü atema registration form tem, Fear Fitness Gym Dimapur, Sports World Kohima aser Ciekhan Fitness Gym

Kohima nung angutsü aser tejangrartem ajak atema tetoktepbu ayongzükba agiba tesem nunga parnok tenung züngoksemtsü atema maongka agütsütsü. Maneni osang tejangjaba agitsü atema strongmannagaland@gmail.com dangi email sütetsü mesera item mobile number tem; 7085962930, 7005297662, 8119888249, 9089959844 ajanga tongteprateptetsü, ta kasa sangdong ajanga metetdaksü.

Haiti fuel tanker apokdak lendong...

July ita Tir Jovenel Moise tepsetba sülen telok balala tsüngta azüdokshiba aser yimtenren nung tashi maitba agi Haiti anakshitsür. Ano iba linük nung August ita menoknok magnitude 7.2 anakba ajanga teraksa jenti bener arutsüba tanaben shia maruteti lir.

Lendong ajurua alir kumzükur temi Cap-Haitien nung totzü abenba gari apokba mürektetba mapang nisung tasü mang sü temesüng agi aleper ali nung liasü aser truck nung inoka bener ao.

Mongulbarnü iba yimti bushia aosang Haitian Ato Kilonser Ariel Henry-ia iba lendong nung nisung aika yirua lir, ta ashi.

"Haiti linük ajunga aoksatsüsa lendong atalokba nung asürtem nem akum agüka iba tesem nung asemnü mang ayimtsü aser yirur alirtem

yaritsü atema Cap-Haitien nung field hospital tem lapoktsü," ta Henry-i Twitter nung sangdong.

Taoba Ato Kilonser Claude Joseph-ia iba lendong nung asürtem mang yima, "Asürtem ajak mangyim tejashi lemsateper," ta tweet asü.

Asana aliba Justinien University Hospital sünga yirur alirtem anitena liasü.

"Kanga sashia temang rongsar alirtem aika anepalutsü tashi mali. Parnok ajakbo mekumzüktsü amai shisa bulua bilemer," ta nurse kati osangbener dang ashi.

Mayor Pierre Yvrose-i iba tensa ya kanga majung lir ta ashi aser teyari talila meshia liasü.

"Onoki nübu nungdaker, aser ano osettsüset, talisa serum, gauze aser kanga mejungi temang rongsar alirtem anepaluba nung amshiba osettem nungdaker," ta Yvrose-

i ashi.

Iba lendong nung yirur alir ajakbo memetet.

Haiti nung aliba United Nations ajanga linük ketdangsurtem den yariteptsü renema lir, ta ashi aser asür kinungertem den asühk lemsatepa liasü.

Mi agi ronger aliba nüburtem yaritsü atema Cap-Haitien dangi emergency kits trok yokogo aser Haitian health ministry den osang agiteper, ta UNICEF ajanga Mongulbarnü shia liasü.

Haiti nung nübur ajunga peritsüsa kodanga electricity yangluteta mali. Linük yimtiba nunga anogo ka nung power ya ghonda ishika ang agütsüteter.

Akoker temi generator amshir, saka telok balalai linük indang totzü lenmangtem nokdangba ajanga totzü agi tali anünga lir.

Sports Minister-i Women's Hockey League Under 21 tenzüksü

New Delhi, Luchii/December 15 (Agencies): Union Minister of Youth Affairs and Sports Anurag Singh Thakur-i Bodhbarnü Major Dhyanchand National Stadium, New Delhi nung mezüngbuba national level Khelo India Women's Hockey League (Under 21) tenzüksüogo.

Iba sentong nung Sports Minister den külemi Minister of State for Youth Affairs and Sports Nishith Pramanik aser Indian Olympic Association tir Narendra Batra aser tanga ketdangsurtemi shilem agia liasü. Iba asayamung nung takok angurtem nem senpet sen lakh 30 agütsütsü, koba MYAS-i lakh 15 aser Hockey India-i lakh 15 agütsütsü.

Asayamung mezüngbuba shilem nung team 14 tokteptsü, koba December 15 nungi 21 tashi asayatsü. Mezüngbuba shilem nung asaya 42 asayatsü aser tanabuba aser tasembuba shilem taruba küm asayatsü.

Mezüngbuba national level Khelo India league ayongzükba atema Sports Authority of India aser Hockey India na nem tenüngsang agütsüba den Sports Minister-i iba league koda tongtibang iba indang jembia liasü. "Asayartem küm tepeyong kanga meranga training agir, saka asayartem tarutsü nung asayamung

tulutem nung tokteptsü atema tetoktepbu balala nung shilem agitsüji kanga tongtibang. Anungji asayartem nem küm tepeyong tokteptsü asoshi maongka agütsüba iba amala league ya kanga tongtibang," ta Thakur-i ashi. Paisa, tarutsü nung tanga asayatem atema-a league tem ayongzüksü ta ashi.

2015 küm sülen tang mezüngbuba Dhyanchand stadium nung sentong tulu ka ayongzükba agir ta shia pai asayartem iba tesemi pelashishia agizük.

Ato Kilonser Narendra Modi indang nukla indang jembiba mapang pai, "Modi indang nukla agi anir onoki iba asayamung ajanga Cheer 4 India sentong tejakdangi bener aoer. Saisapong nung India wako temaba jenjang nung yimzüdaksütetsüsa lanur asayartem aika lir ta ni amanger," ta Thakur-i ashi.

Kasa mapang nung IOA tir Batra-i, Hocket asaya India kübok tesem ajaki prokshia yoktsü atema iba league yagi tongtibang shilem ka agitsü, ta ashi. "Iba ya sentong tulu ka ta amanger. Küm 5-6 tsüngda SAI aser Ministry of Youth Affairs and Sports-i teyari agütsüba ya kanga tulu aser iba ajanga taküm Olympics nunga Hockey asaya nung takok Hajung ngutetogo," ta batra-i ashi.

Sunil Gavaskar nem SJFI medal agütsütsü

Mumbai, Luchii/December 15 (Agencies): Mongolbarnü, Sports Journalists' Federation of India (SJFI)-i Cricket asayar mongin Sunil Gavaskar nem 'SJFI Medal' agütsütsü telemtetba agiogo.

Guwahati nung Sports Journalists' Federation of India pur Annual General Meeting (AGM) senden agiba mapang Gavaskar nem iba medal agütsütsü lemetet.

Neeraj Chopra, shibai Tokyo Olympics nung India atema gold medal angü, pa nem 'SJFI Sportsman of the Year' naroküm agütsü. Kasa asayamung nung silver medal angur, weightlifter Mirabai Chanu nem 'Sportswoman of the Year' naroküm agütsü, ta sangdong ka ajanga metetdaksü.

Tokyo Olympics hockey asayamung nung bronze medal ngur aliba India tebur hockey team nem 'Team of the Year' naroküm agütsü. Olympics nung India hockey team-i küm 40 nung mezüng medal ngua liasü.

Paralympics nung India tenüng nungi shilem agir Sumit Antil aser Pramod Bhagat naprongla nem 'Para-athlete of the Year' (men's category) award aser shooter Avani Lekhra nem 'Para-athlete of the Year' (woman category) award agütsütsü.

Kasa senden nung AGM-isa SJFI tir tasen ama A Vinod (Kerala); Secretary ama Prashant Keni (Mumbai) aser Treasurer ama Vidyut Kalita (Assam) nunger shimogo.

Tanga 'Executive Committee' züngsem temji yamai alitsü:

Vice Presidents: Devendra Pandey (Mumbai), Vikas Pandey (Indore), Sambit Mohapatra (Odisha) and Saraju Chakraborty (Tripura). Joint Secretary: Amitabha Das Sharma (Kolkata)

EC Members: Amol Karhadkar (Mumbai), C Santhosh Kumar (Tamil Nadu), Suprabhat Debnath (Tripura), Partha Chakraborty (Assam), Sushin Ghosh (Assam), Nilesh Deshpande (Nagpur), Tushar Trivedi (Gujarat).

BILEMDANGANG

"Anema aliba dak alia tanga rongsen tuluba mali."